

## Taŋtaŋa tsghatá lwa Pwal ŋa 1 La Tesalunik

<sup>1</sup> I'i Pwal ta vindaghunafta, kawadaga ŋni nda i Silas nda Timute, ŋa kaghuni Igliz, mnduha Lazglafta Da nda Mgham Yesu Kristi ma luwa Tesalunik. Ka vlaghunavla Lazglafta ta zďakatahudi, nda zďakwani.

*Zlghay nda ŋudufa* la Tesalunik

<sup>2</sup> Ta gdagda ŋni ta rfa Lazglafta ta ghəŋa kaghuni demdem. Ta kulay ŋni ta kaghuni ma du'a ŋni. <sup>3</sup> Ta gdagda ŋni guli ta havakta ta kəma Lazglafta Da ŋni ta slna zlghay nda ŋudufa ghuni, nda yifatá slna ta magə kuni, kabga dvafta ya dvaf kuni nda dihata fatá ghəŋa ghuni ta Mgham Yesu Kristi. <sup>4</sup> Zwanama da, nda sna mu kazlay: Dvudva Lazglafta ta kaghuni ka zbaftá tsi ta kaghuni ŋa nzakway ka ŋani kə'a. <sup>5</sup> Ma mnaghunata ŋni ta Lfidá Gwada ná, gwada nda wubisim kweŋkweŋ yeya a mnaghuna ŋni wu, nda mbrakwa Sulkum nda ghuba guli mnaghunata ŋni. Nda sna aŋni kazlay: Vərda gwada tsa gwada ta gwadə ŋni ya kə'a. Nda sna kaghuni ka aŋni nzakwagaptá nzaku da kaghuni ŋa kata kaghuni. <sup>6</sup> Kaghuni, ksafksa kaghuni ta sadá ŋni, nda ŋa Mgham Yesu. Dər má ta ghuya dāŋwa kuni katakata, tsu'aftsu'a kuni ta gwadani nda rfu ma mbrakwa Sulkum nda ghuba\*. <sup>7</sup> Mantsa ya marananta kuni ta ŋərmata nzakwa ghuni ta mnduha Lazglafta ta hadika Mekaduniya nda ya ta hadika Akaya. <sup>8</sup> Əŋka'a ka kaghuni kəl ndəghatá mnduha ka snantá gwada Mgham Yesu ma inda vli. Ta hadika Mekaduniya nda Akaya yeya a kuraghuta tsi wu, snanaghasna ta mnduha dər ndigandiga

\* 1:6 Ngha ta Slna gwal ghunay 17:5-9.

ká kuni zlgħaftá Lazglafta. Had gwada ŋa mnəgəlta ŋni ŋa taŋ ta ghəŋa ghuni wa. <sup>9</sup> Nda wa taŋ ta rusa mnduha ŋa ŋni, ká kuni tsu'aftá aŋni ma lagha ŋni da kaghuni, nda ya ká kuni zlaŋtá skwa wuyay ka mbədavata tsəlbu ta kəma vərda Lazglafta ya ta vla hafu, <sup>10</sup> ŋa kzla zwaŋani Yesu, ta saha ta luwa. Tsa zwaŋani sli'aganap Lazglafta ma mtaku, ta klaptá amu ma guma Lazglafta ta sagha ya.

## 2

### *Slna Pwal ma luwa Tesalunik*

<sup>1</sup> Zwanama da, nda sna kaghuni kazlay: Nza a tsa lagha lagha ŋni da kaghuni ya ka bətbət wu kə'a. <sup>2</sup> Nda sna kaghuni guli ka ŋni ghuyə ta daŋwa ma luwa Filipiya, nda ya ká həŋ razanata. Ama ka taftá ŋni ta us tiri nda mbrakwa Lazglafta ka mnaghunatá Lfida Gwada ta sagha da Lazglafta mataba ndəghata ghuya daŋwa. <sup>3</sup> Gwada ya mnə ŋni ná, had tsakalawi mida wu, had nənba kaghuni mida wu, had bara kaghuni mida guli wa. <sup>4</sup> Katək ná, manda va ya klaf Lazglafta ta aŋni kazlay: Nda ra kuni ka mna Lfida Gwada kə'a ka vlaŋnata ya, manda va tsaya ta mna aŋni. Mna a aŋni ŋa zdanafatá ŋuduf ta mnduha wu, ŋa zdanafatá ŋuduf ta Lazglafta ta mna aŋni. Nda sna tsatsi ta skwi ma ŋudufa mu. <sup>5</sup> Nda sna kaghuni kazlay: Ta walaŋ a aŋni ta hihijaŋtá hihijaku da mndu wu kə'a. Had gwada ŋa hahatá mndu gwada ŋni wa. Nda sna Lazglafta kazlay: Mantsa ya nzakwani kə'a. <sup>6</sup> ŋəvaŋ a aŋni ta rfaŋnaghata mnduha, dər kaghuni, dər sanlaha ma mnduha wa. <sup>7</sup> Dər má dza'a maray ŋni ta glakwa nzakwa ŋni ka ghunata mnda Kristi mndani ná, maraŋ a aŋni wa. Katək ná, lebtəkw hanaganata ŋni ta ghəŋa

ɲni manda ya ta nghə marakw\* ta zwanani ya. <sup>8</sup> Ma tsa fatá ghəɲa ɲni ɲaghuni ya ná, mnaghunatá Lfida Gwada ta sabi da Lazglafta kwenkwen yeya a mnaghuna ɲni wa. Kumanjuma ɲni ta vlaghunata nda hafa ɲni tani, kabga lamla kuni da ɲudufa ɲni kahwathwata. <sup>9</sup> Zwanama da, ta havakhava kuni ta datá vgha ɲni ka maga slna da kaghuni. Si ta ksay ɲni ta slna nda rvidik tani, nda fitik tani, kada kwala ɲni da ghuyanaptá daɲwa ta dər wati mataba ghuni, nda skwi ɲa zay ɲni ta mnə ɲni ta Lfida Gwada ta sagha da Lazglafta ɲa ghuni.

<sup>10</sup> Nda sna kaghuni kazlay: Nda nza kaghuni ka masləmtsəka ɲni kə'a. Mantsa ya nzakwani da Lazglafta guli. Ka ɲərma mnduha nzata ɲni da kaghuni, ka mnduha Lazglafta, ka gwal tdukwa nzakwa ɲni, had sana skwi ɲa tsanavata wa. <sup>11</sup> Nda sna kaghuni guli kazlay: Manda nzatá nzakwa i da nda zwanani ya nzata ɲni nda inda kaghuni, <sup>12</sup> ka vla hidaku nda mbraku ɲa ghuni. Vlaghunavla ɲni ta hidaku, ɲa nzay ghuni ta nzaku manda ya ta kumə Lazglafta ya ta hgaftá kaghuni ɲa lama ghuni da ga Mghamani nda glakwani ya.

<sup>13</sup> Ta gdagda ɲni ta rfa Lazglafta guli, kabga ma fitika mnaghunata ɲni ta gwada Lazglafta ná, tsu'aftsu'a kuni, ka zlghafta manda va gwada gwadagap Lazglafta, manda ya gwadagap mnduha a wa. Manda va tsaya nzakwani kahwathwata, sagha da Lazglafta tsa gwada ya, ka ksə tsi ta slna ma kaghuni ta zlghafta ya. <sup>14</sup> Zwanama da, nuna kaghuni manda Igliza Lazglafta ta nzakway ma Yesu Kristi ta hadika Zudiya† ya. Ghuyə ghuya kaghuni ta daɲwa da gwal ta hadika ghuni, manda ya ghuyanap la Yahuda ta

---

\* 2:7 Mamu dzəghu ma lebtekwaku: Nanza ɲni lebtekw. Ka nzatá ɲni manda zwani kwitikw kwitikw, ka sanlaha ta mnay. † 2:14 Ngha ta Slna gwal ghunay 17:5-6.

hahəŋ ya. <sup>15</sup> Tsa la Yahuda ya ta pslatá la anabi, ka dzatá həŋ ta Mgham Yesu, ka limistá həŋ ka giri<sup>‡</sup> ŋa mu guli. Zdəgana a tsa skwi ta magə həŋ ya ta Lazglafta wu, nda nza həŋ ka ghuma inda mnduha. <sup>16</sup> Ta kumay həŋ ta pyaftá aŋni ta mna gwada Lazglafta ŋa gwal kul nzakway ka la Yahuda, yaha həŋ da mbafta. Ndanana, hđanamhđa həŋ ta dmakwa taŋ, ka kdavakta tsi nda basafta Lazglafta ta ŋuduf ta ghəŋa taŋ<sup>§</sup>.

<sup>17</sup> Aŋni zwana ma, tahula dgata mu ta vgha labla fitik mida, kuma mu yeya kul guyafta. Nziya nza tsi ná, kawadaga mu ma ŋuduf. Ta ksarŋaksa mamaya ghuni katakata. Ta kumay ŋni ta nghaghunaghata. <sup>18</sup> Mantsa ya ná, kumafkuma ŋni ta vradaghata da kaghuni. Nda kda fitika i'i Pwal ka ghəŋa da ta fatá fitikani, ama ka pyaftá halaway ta aŋni. <sup>19</sup> Ta wa fatá ghəŋa ŋni, nda haratá ghəŋa ŋni, nda ghərba zewazewa glaku dza'a ŋni mutsay badu fitik dza'a sagha Mgham Yesu Kristi ya katək na? Ta kaghuni ya a katək tsa wa? <sup>20</sup> Manda va tsaya nzakwani, kaghuni glakwa ŋni, kaghuni haratá ghəŋa ŋni.

### 3

<sup>1</sup> Sana skwi guli ná, ma trapta ŋni ta kzlay, mal nzaghu mu hadna ma luwa Atina\*, ka ŋni <sup>2</sup> ka ghunadapta da kaghuni ta Timute ta nzakway ka zwanama ŋni, ta ksa slna Lazglafta ya guli. Kawadaga ŋni nda tsi ta mna Lfida Gwada ta ghəŋa Yesu Kristi. Ghunadap ghuna ŋni da kaghuni ŋa sgaghunaghatá mbraku, ŋa dihavata ghuni ma zlgghay nda ŋuduf, <sup>3</sup> kada kwala ŋudufa dər wa da tđu ma

<sup>‡</sup> 2:15 Ngha ta Slna gwal ghunay 9:23, 29, 13:45, 50, 14:2, 5, 19, 17:5, 13, 18:12.

<sup>§</sup> 2:16 Ta ghəŋa aya 15-16 ná, grawa gra nda Ruma 11, ma vla mnay Pwal ta gwada ta ghəŋa kđanaktani kahwathwata ta mna gwada ta mbaku, ŋa la Yahuda. \* 3:1 Ngha ta Slna gwal ghunay 17:15-16.

na ghuya daɗwa ndanana, kabga nda sna kaghuni kazlay: Favamafa Lazglafta ta tsaya kə'a. <sup>4</sup> Ma fitika nzakwa ɗni da kaghuni ná, ghadaghada ɗni ta mnaghunata kazlay: Dza'a mamu ghuya daɗwa katakata kə'a. Tsaya tama ta slaku manda va ya snaɗ kuni. <sup>5</sup> Ma trapta da ta hbanatá ɗudufa da, kəl yu ka ghunadaptá Timute da kaghuni, ɗa snaɗtá nzakwa zlgħay nda ɗudufa ghuni. Ta zləɗay yu ta baraghata halaway ta kaghuni, da nzatá tsa slna maga ɗni ya ka bətbət.

<sup>6</sup> Ndanana tama, sli'afslí'a Timute da kaghuni† ka vra-gaghuta da aɗni, ka rusaɗnaftá tsi ta gwada ta zlgħay nda ɗudufa ghuni, nda ya ká kuni ta dɗutá mndu. Ka mnaɗnaftá tsi guli ya ká kuni ta famtá aɗni ma du'a ghuni dardar, nda ya ka kuni ta kuma nghəglantá aɗni, manda ya ta kumə aɗni ta nghaɗtá kaghuni ya guli. <sup>7</sup> Tsaya tama zwanama, lbaɗnalba zlgħay nda ɗudufa ghuni ta ɗuduf, ma tsa ghuyata daɗwa ɗni basu ɗni ya. <sup>8</sup> Ndanana tama ná, ta hafu ɗni, kabga dihatá vgha ghuni ma ndi'atá vgha ghuni ta Mgham Yesu. <sup>9</sup> Ndaw dza'a rfa ɗni ta Lazglafta ɗni ta ghəɗja kaghuni ma na zdaɗnafta zdaɗnaf kuni ta ɗuduf ta kəmani na? <sup>10</sup> Nda rvidikani tani, nda fitikani tani ɗni ta ndi'ata ka maga du'a da tsi, ɗa vlaɗnatani ta tvi, ɗa lagha ɗni da nghaghunaghata, nda ya ɗa kdighunistá skwi ya ta pdaɗhuta ma zlgħay nda ɗudufa ghuni.

<sup>11</sup> Má ka bhadarɗnagħaɓha Lazglafta tsatsi ka ghəɗjani ta nzakway ka Da mu, nda Mghama mu Yesu, da kaghuni. <sup>12</sup> Kaghuni ya guli, má ka sgaghunagħa sga Mgham Yesu ta tsa dɗu mataba ghuni ya, nda ya ta magə kuni ɗa inda sanlaha ma mnduha ya guli, ka nzakwa tsi manda va ya ta dɗu aɗni ta kaghuni ya. <sup>13</sup> Má ka sladanafslada Lazglafta ta ɗudufa ghuni ɗa nzakwa ghuni nda ghuba kul had' gwada

---

† 3:6 Ngha ta Slna gwal ghunay 18:5.

ta ghəŋa ghuni ta kəma Lazglafta Da mu, badu sagha dza'a sagha Mghama mu Yesu Kristi kawadaga nda inda duhwalhani ya.

## 4

*Nzaku ta zdəganatá Lazglafta*

<sup>1</sup> Zwanama da, nu skwi ta pfaku ŋa mnay, ya nda ghada taghaghunafta ŋni ka kuni da magay ŋa zdəganatá Lazglafta. Ya manda va tsaya ta nzakwa kuni ta tsa nzaku na. Ta ndəba ghuna ndəba ŋni ta dzvu katakata, ta vlaghunavla ŋni ta hidaku manda va tsaya. Ma hga Mghama mu Yesu Kristi, ka kdəŋta kuni ta dza'a ta kəma ta kəma. <sup>2</sup> Nda sna kuni ta nzaku ya taghaghunaf ŋni nda ma mbrakwa Mghama mu Yesu. <sup>3</sup> Skwi ya kumə Lazglafta ná, nzata ghuni hezle' a ta kəmani kul had hliri. <sup>4</sup> Snaŋta dər wa ta nzaku nda markwa taŋ, ka vlarŋtá glaku manda ya ta kumə Lazglafta, <sup>5</sup> ŋa ghudzaku tida manda ŋa gwal kul snaŋta Lazglafta ya a guli wa. <sup>6</sup> Ma tsa skwiha ya tama ná, ma tsaghu sani ta sani ka nənəbapta, kabga dza'a ghuzlanap ghuzla Lazglafta tiri ta gwal ta maga mndərga tsaya, manda ya ghada ŋni ta mnuta ya. <sup>7</sup> Hgaf a Lazglafta ta amu ŋa maga sli'iŋsli'iŋ wa. Hgaf ŋa nzata mu hezle' a ta amu. <sup>8</sup> Tsaya tama, ka va a yu ta tsa gwada ya wu ka mndu katsi, mndu a vziŋ tsi wu, Lazglafta ta vlaghunatá Sulkumani nda ghuəba ya vziŋ tsi.

<sup>9</sup> Ta ghəŋa dvuvusta ghuni ta ghəŋa ghuni ná, ta dza'a vindaghunafta nda vinda a lu wu, kabga ghadaghada Lazglafta ka ghəŋani ta taghaghunafta. <sup>10</sup> Tsaya skwi ta magə kuni ŋa inda\* mnduha Lazglafta ta hadika Mekaduniya demdem. Ta ndəba dzva yu da kaghuni zwanama, ka kdəŋta kuni ta magay ta kəma ta kəma.

---

\* 4:10 Ngha ta 2 La Kwareŋt 1:16.

<sup>11</sup> Ɔavawaŋa ka nzata kuni nda zɔfaku, ma tsatsafaku kuni ta tsatsafaku, magawamaga ta slna nda dzva ghuni ŋa kata ghəŋa ghuni, manda ya ghada ŋni ta mnaghunata ya. <sup>12</sup> Ka mantsa ka kuni magay katsi, dza'a vlay gwal ta kul zlgħafta ta glaku ŋa ghuni, haɔ kuni dza'a slaslamaku guli wa.

*Gwada ta sagha Mgham Yesu*

<sup>13</sup> Zwanama ɔa, ta kumay yu ta sɔaŋta ghuni ta skwi ta ghəŋa gwal nda rwa, da nzatá kuni sasu'anaka manda gwal ta kul faɔta ghəŋa taŋ ta Yesu. <sup>14</sup> Tsohala grafgra amu kazlay: Mtumta Yesu ka sli'agaptá tsi kə'a ya, mantsa ya guli ná, grafma gra guli kazlay: Dza'a sli'aganapsli'a nda ma Yesu ta inda gwal ta rwuta kawadaga nda Yesu ma zlgħay nda ŋuɔuf guli kə'a.

<sup>15</sup> Na gwada dza'a ŋni mnay ndanana ná, gwada ya mna Mgham Yesu ya. Baɔu tsa fitik dza'a vragata tsi ya ná, tiŋlaghuta a amu ta ndiri ya ta gwal nda rwa wa. <sup>16</sup> Baɔu tsaya, dza'a ghudzaga ghudzaga lwa Lazglafta, ŋa kapaŋta mali ta ghəŋa duhwalhani ta lwi, ka vyatá dula Lazglafta, ŋa saha Mghama mu Yesu ka ghəŋani ta luwa, ŋa sli'agapta gwal nda rwa ma Kristi karaku taŋtaŋ, <sup>17</sup> ŋa hla amu ta ndiri ya kawadaga nda həŋ ma ghwayak, ŋa dza'a guyaku nda Mgham Yesu ma ghuvanata luwa. Mantsa ya tama, ŋa nzakwa mu ŋa ɔekɔek kawadaga nda Mgham† Lazglafta. <sup>18</sup> Tsaya tama lóuvuswa ŋuɔuf nda tsa gwadaha ya.

## 5

*Sna a lu ta fitik dza'a vragata Yesu wa*

<sup>1</sup> Zwanama ɔa, pahəgla a kuni ta vindaghunafta ka ta wati fitik, nda ya ka ta wati luwa dza'a magakwa tsa skwiha

---

† 4:17 Aya 15-17: Gray nda 1 La Kwareŋt 15:51-52.

ya wa. <sup>2</sup> Nda sna kaghuni ka ghəŋa ghuni kazlay: Manda ghali ta sagha girvidik\* ya dza'a sagha fitika Mgham Yesu kə'a. <sup>3</sup> Ma fitika mnay mnduha kazlay: Zda nzaku, ta had hwazlabaku† wu kə'a ya, gi ma tsaya dza'a slakwa badzaku, manda va ya ta sagha fitika dgakwa marakw nda hudi dluk ya. Had həŋ dza'a ndapta mida wa. <sup>4</sup> Kaghuni zwanama da, ma grum a nzatá nzakwa kaghuni, ŋa sagha tsa fitik ya ksaghunaghata manda ghali wa. <sup>5</sup> Kaghuni demdem ná, zwana tsuwadaka fitik kaghuni. Nza a amu manda gwal ma grum girvidik ya wa. <sup>6</sup> Ka si mantša tsi katsi, ma ksu hani ta amu manda ŋa sanlaha ya. Katək ná, nzamanza hzleŋa ndiri ka zlahá vgha mu. <sup>7</sup> Gwal ta hani ná, girvidik ta hana həŋ ta hani, girvidik ta ghuyakwa həŋ ta ghuyaku guli. <sup>8</sup> Amu ya, gifitik ta mbada amu ta mbada. Zlahá ma vgha mu. Klafma zlgħay nda ŋuduf nda dvu ka nzakwa həŋ manda sudatá lguta kufur ŋa wara nda tsi. Fafma ghəŋa mu ta mbaku manda fatá takazak‡ ma ghəŋ. <sup>9</sup> Pəgha a Lazglafta ta amu ŋa ghuzlamap tiri wa. Hgafgha ta amu ŋa mbamafta nda ma Mghama mu Yesu Kristi. <sup>10</sup> Ta ghəŋa amu mtuta Yesu, ŋa nzakwa mu kawadaga nda tsi. Dər má ta nda iri mu, dər má nda rwa mu, kawadaga nzatá nzakwa mu nda tsi. <sup>11</sup> Tsaya tama, mbruvuswambra ta vgha ghuni, katuvuswa kata ta vgha ghuni manda ya ta magə kuni ndanana ya.

### *Dzatá ghəŋa gwada Pwal*

<sup>12</sup> Zwanama da, ta ndəba dzvu yu da kaghuni, vlawa glaku ŋa gwal ta ksa slna Lazglafta mataba ghuni, gwal zbap Lazglafta ka fata ta ghəŋa kaghuni ŋa taghaghunaftá tvani ya. <sup>13</sup> Vlawa glaku ŋa taŋ dar ka dvtuta kuni ta

---

\* 5:2 Gray nda Mata 24:43, Lukwa 12:39, 2 Piyer 3:10. † 5:3 Gray nda Irmija 6:14, 8:11. ‡ 5:8 Gray nda Isaya 59:17, Afisus 6:11-17.



həŋ katakata ta ghəŋa slna taŋ. Nzuvuswanza nda zdaku mataba ghuni, nda ya nda sanlaha guli.

<sup>14</sup> Zwanama da, ta ndəba dzvu yu da kaghuni, dvawadva ta gwal ta yađi, tsafarawa gwal huleb̄huleba, vlawa mbraku ŋa gwal htu mbrakwa taŋ, ka ksa kuni ta ŋuduf nda inda mndu. <sup>15</sup> Daswa ka kuni, da vranamtá mndu ta ŋaslu ta mndu nda ŋaslu. Ŋavawaŋa katək, ka maga skwi ya dina mataba ghuni, nda ya ŋa hamata sanlaha tani.

<sup>16</sup> Nda rfu ka kuni nzakwa ghuni. <sup>17</sup> Ma zlanap kuni ta maga du'a. <sup>18</sup> Rfanaghawa Lazglafta dər ta ghəŋa wati ma skwi tsi, kabga tsaya skwi ŋa magay ghuni ta zdəganatá Lazglafta, na tsa kaghuni gwal nda ndi'a nda Yesu Kristi ya.

<sup>19</sup> Ma su'ufiŋ kuni ta Sulkum nda ghuḅa, <sup>20</sup> Ma mnə kuni ta mtsiriu' nda gwac̄a la anabi. <sup>21</sup> Ama kwatsadapwa inda skwi demdem, ka zbapta kuni ta ya dina, <sup>22</sup> ka tsaghuta kuni ta vgha nda inda bəd̄zaku.

<sup>23</sup> Ka ghubaghunaghūba Lazglafta ya ta vlatá zdaku kaghəŋani, ka naghunaftá tsi ka ŋani dardar. Ka ngha tsatsi ta kaghuni tsuhtsuh, nda sulkuma ghuni tani, nda hafa ghuni tani, nda slu'uvgha ghuni tani. Tsaya dza'a kwal rutsak kul nzafta ta kaghuni ma fitika sagha Mghama mu Yesu Kristi. <sup>24</sup> Dza'a magay tsa Lazglafta ta hgaftá kaghuni ya, kabga ta magay ta inda skwi ya mna tsi.

<sup>25</sup> Zwanama da, ndəbawa dzvu ta ghəŋa aŋni.

<sup>26</sup> Ka ganaghata kuni ta zgu ta zwanama nda d̄vaftá vgha hmətət.

<sup>27</sup> Ta ndəba ghunatá dzvu yu ma hga Mgham Yesu. Ka dzananafta kuni ta na delewer na ta inda zwanama.

<sup>28</sup> Ka nza zdakatahuc̄a Mghama mu Yesu Kristi kawadaga nda kaghuni.

Deftera Lfića Dzratawi  
New Testament in Hdi

copyright © 2013 Wycliffe Bible Translators, Inc.

Language: Hdi

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2013, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Hdi

© 2013, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

